

朱太復文集

朱太復文集卷之二十五

五海朱長春太復著

序

徐養浩刻舉子義序

世嘗恠古才士於文章每每不合調而合志如司馬
子長以百代良史之才著作冠冕一時而長卿都麗
易倩恢詭又皆讓其品定致其艷喜咨嘆之聲他至
曹劉異局而諧潘陸異情而美陶謝異體而工由後
世目之且如今和對壘而相兵而由諸人士賡曲合

奏則吾之臭味也何說也余與徐子同歲上計待公車蓋余三上而第徐子四上而第則操筆為博士家言往來揚權者且七年今先後行於四方四方士具見之豈謂其如瑟諧哉然而兩人當其接席披摺分賓而談則揚揚相喜各相標相推今果相效也以故徐子刻所為業而命余序之余而不敢辭夫言何必相同山之毛也澤之苗也禽蟲之皮甲也石之屑也不同意而同齊歸中於病也天有樞九野二十八宿離廣狹環焉地有海江河百川巨細之流歸焉然

文無樞而無歸乎如其無也選形而堅白鳴何不
可予確如其有也近者待遠者超過者俯不逮者踰
約其高哥精其夷澹獨匪殊途而一歸乎吾病今之
習業者標先民之遺唾而翦其奇以自湊砌為文碎
不成章連作傷理方且媛姝以草竊相詡也夫文生
於情情生於神神生於理造之者合背之者離由千
年以來體變而法不變故譚文無取奇正深淺色貌
之異取其融融奕奕情暢而神善為合理而止矣夫
貴乎子弟被服容與而風氣凝令可望至使優者學

之侈為儀便辟有象則安息之眩伎而已曾不如彼
子弟之跣而立也故曰寧為雞尸無為牛從尸王也
從無主而效者也無理之文是無主也奈何哉今天
下皆從牛之徒彼將為眩乎抑又有不得眩者夫乃
鄭巫之滅乎吾故固勸徐子者行其言以為招遵理
比辭亦有知者何必艱奇哉無使後來不察詬余等
為亂首

吳三生予寧草序

予寧自漢優博士弟子以隆孝至今仍之寧寧廢不

事事也宜三年悲慕泣血之無休安用文哉雖然今
之持喪者非昔之持喪也苟當戚而憤其所以儻猶
有顯親之恩乎不已賢乎乙酉歲予同舍弟自舒扶
母陳孺人喪至吳既充充待客畢退服舍而讀禮禮
予兄弟故業也因舉前義以問課弟而鮑生故社友
曾刻其篇於庀言天下所稱為西吳英少鮑子者而
鮑生後有史生妙才特起以少季為諸儒生前茅吳
中舉談髦士稱鮑史無先則兩君皆亦累然疲次也
而史又以其讀禮棄所習尚書而請業於予故與季

氏三人因往來為文輒以示余余曰馬遷稱古人憂憤著書夫士有文采者皆能言成章何必獨以憂者憂者多起自身遭窮厄窮厄患通故其發言多出其所結積志苦而神凝一宣其名言而萬世不朽彼其一身之所憂適去順也而若是自聖賢不免况乎士業被傷服受其書不早取世資及親而奉釜今以號天不待之悲憤而圖後成志既沒徽榮見存父母之憂大於身焉安得無有若自灸之勇乎猶為寬矣當是時志逾苦神逾凝讀其言永懷嗚嗚有愁牢激

之聲將是觀者焉故蒙我之詩能令人廢誦何其寄
深也文之凝神亦宜如是矣且夫射以前期難故天
下不皆羿百發百中之巧如承蜩也此凝之說也故
廢一而鼓二十五弦皆動言巧則絕矣然而不如敲
音咻咻者非加幼眇之聲取其神而已矣今之為文
者何異衣章甫於偶人屑黃金而塗器哉

神理不具而華言蔚然故下士移中士
疑上士咲而唾之衆反謂厲也此非言隱榮華之謂
與故凡文之凝神宜如是矣而人不信吾言也夫知

者愚愚愚者謂知愚自古既然方晉平公鑄鍾子野之聰不能獨奪羣伶之口至於師消審之而後不和多夫惟知音乃能辨音曠與消纔兩人耳何取多口之雷同今吾一人言不和不信言和不信天下豈無消之耳哉故欲以三生文卜之其憂思而凝者如此文之凝神宜如是矣

詩自序

不佞蓋嘗論詩至難自為詩十率未嘗敢自滿志也嘗皇皇恐一言之無比於古嘗畸於人不敢為溺音

習移又未嘗敢叫蹕自壯與世諸君子善鳴堅白者
亢故十年不求名人亦不我名然以名如諸君子雖
燁然傾一世不佞亦不敢顛焉歲己丑冬過吳門訪
李杜玄於虎關杜玄少年希古甚盛自為詩美秀有
唐人之聲則索予詩讀之爽然大喜相結以不佞者
能不為今之詩也杜玄苦持去刻之業不得止杜玄
顧杜玄獨好謂我能不為今亡謂今將目我為不祥
厲物哉我故不愛名如譽人者不自為地乃不辭自
為解以序曰詩之用尚矣不佞何敢與焉其義則竊

聞之詩者施也施之章曲道其志詩者持也持之禮義善其情兩者備而後音節生焉故曰文采節奏聲之飾也三百九歌無議矣古體絕於正始近體絕於大曆非其比詠聲華之絕施不諧而持不正也要以古人言志理情則為無詩故詩有本有末亢者夷者深茂者清冲者奇者典者華鮮者吟焉各得其性之所近揔歸於和諧無不合則有本之故如百昌生而有根未有離情而得為詩今世之言詩者家宗漢魏人擬開寶以為繫宋元則斌斌盛哉然名耳其實亡

以過率大之士鞭叱風雲睥睨天地目為高矣然而
沈洋無當遠不相次則傷體也博比之士稽按成言
鉤引故實目為富然而補綴離跂而詰屈不可韻則
掩於情也都華之士采鮮美揚聲調爛然鏗然目為
工然而塗飾遂外往往偽而去其真則無質也樸古
之士損約文物酌施情理以要於雅而其希踪太過
高而鬱乾而無聲則又質而不成方也清貴之士恬
簡自好冲情諧曲以要於和而其易而薄拘而不能
變致溢而骨易則又不成格也故兒之或佳神之不

善句之或工章之不合調之或諧理之不中篇之或成體之不適其末未嘗不似而本稍陵夷也夫使天下之物若薰蕕雖盡無薰不累有薰外而蕕中且令天下不知薰故孔子曰惡似而非此微寧無過宋元殆又甚哉不佞心塞而未能辯真性孤不能同波於時而有古癖自少居平憤憤以為詩雖小技然大雅關天地元音萬古不可磨滅故時猶往往與滌蛙迭進退而定自中唐以來沿到今垂千季響絕竅矣雖曰世衰道則人心亦使然夫好名速成護拙欺人賢

豪才子往往有之故始不得不借色以徇行既則流
遁而錮情其究不知古人之是而已之非以旦夕虛
名熏心號曰陵古而無前要古人已陳無口莫舌爭
矣百季之後吾等亦無口而使後人寘我同古人委
定其短長夫措足何地乎唐十才子以來今聲稱得
無如前竭一生聰明嘔肝之用竟令聲與名滅不佞
義不可出此自弱冠鄉舉後與里鄭允升遊得知誦
所為古人詩三年而求之意倪知有端矣未得其骨
又三年而求之體局知有會矣未得其機尋仕為令

膠膠日夜簿書徵會之不給廢墮故業為詩亦耘
支離似不可進於技已乃艱歸杜門五率重得間汎
濫於諸家初深求之一率而率二率而出又微求之
一率而澤二率而揚今乃求之罔象於古人神境有
無離合妙解旦暮之指稍稍涉涯而望中似津津焉
然又瞠後之果過此未知而力已竭矣不知所進故
不佞獨論詩至難奈何今為詩易之也易者從外難
者從內穀種於土發為苗穎而采苗穎不可生穀故
內求之其執必出而外不可復入故曰傳神全在阿

堵中四體何關哉雖然不佞大言矣行之惟艱能不
為今不能為古幾莊周言寄蹟者之造怨耶若夫不
悅遠而高不詰屈而博華而實雅而韻清中而王則
古之人古之人哉庶幾千秋雅道之屬乎 國家運
至隆作人至久天下至大必有卓絕一代之豪起而
任之長春將執業氏首而事焉詩興意在茲乎意在
茲乎

鄭允升詩序

蓋予與鄭子為詩十五年而鄭子與王時立先子為

詩十季當是時五子之聲盈天下天下風騷之客游其門或借其名廩廩稟約束唯謹非是者賓夷之而鄭子奮然義不可謂是溺變古亂天下也自黷憤沈酣求古人於篇什之中召好去惡離象討真究其歸於子美常自言曰音生心詩言志三百篇以真情陳事叅飾文質而要其和故曰溫柔敦厚詩教也志之所至詩亦至焉不循其本而尚聲是採春華而忘其實也巧笑倩兮美目盼兮笑與盱為美也而豈其所以美哉漢魏以下靡靡者皆忘其所以美也唐約之

近體音始節子美歸之性情而音始真吾其從是乎
所為詩壹以刊華去剝力務振大曆以降之濫而感
興會心自陶其天機要於真蓋是時與王子西人獨
唱獨和無有應者間亦救弊太甚哉而本體具是嗣
得子相揚榷斟酌會於風調骨理本委質文之間固
予多資鄭子而鄭子業日以深予猶參差上下獵於
諸體不能定而鄭子獨得於子美其專工焉五言詩
至者幾於肖物乃所謂正聲雅音不絕於天地其在
茲乎非夫拔俗薦意嗜古何以幾焉或曰詩者樂出

也三王不襲禮五帝不沿樂各自飾音華德成方播
曲合一代之章比於節適於時時之人箎和而習其
音是曰詩矣必其初音則土鼓之節加咸池而麗於
韶武乎當世為文急名介拂世而狎諸古已用之又
有曰聲之濫也如水之波每流愈下杜甫之於詩蓋
九河碣石之會哉驚其望洋不知且弱水入之尾閭
也誠鄭子好古奚不窮其源而揚其波習杜者又曰
吾子美豪伉而鄭舅清子美博依而鄭冲夷子美無
方物無不有而鄭子已已精乎自己偏得老聃之道

而奈何詬人偏之極痼痼之極已甚今其行鳴缶集
則真矣曷云質不俚焉濫觴而滔天君子不防其流
乎予曰不然鵠鵠不可以語目蜉蝣不可以語夕染
俗者不可以道古鑑額者不可以窺神詩自江左三
變性情轉離巧以浮溺以淫浸入宮體極矣唐再變
再進至乎美而風風始大雅也根於周楚強以漢魏
潤以六朝體既博比力復縱橫如山有嶽水有海天
下走望朝宗而恠石惡濤亦往往以是揔之不離性
情得之鄭子會其本擷其華而避其恠亦其才可精

不可大其為人清真冲委與子美孤憤豪懷不同科
治亂不同時言為心聲學焉得其性如是耳夫伶官
疇人之比曲也唱而難和而易獨進難旅而易古而
難鄭衛而易何則隨附者易匿而抗俗難為工也鄭
子起書生衡棲谷處之中位卑名隱寡與多讐毅然
采真探本任五百年湮絕不明之緒以與諸君子抗
而爭道今四方之士誼毀新聲不少身死名衰言易
耳叅半又出於叛人豈與鄭子卓立遠攬獨詣紹古
越一世齊等哉而俗又隨少訾之夫曩者豪賢率訐

之士事不師古高旦夕之譽暴虛以寵世世既莠然
置弗敢論而追雅揀文斌斌如鄭子業已身竊丘里
倡天下以進古始而天下希所顧化又何不譽之有
也救弊去甚辨才取長今一世摘詞家劃然揭雲霧
而睹中天吾吳興遂斐斐號多人誰為鑒空而功至
此而奈何不見推而多口夫石無瑕玉有瑕數圍之
梗中液扶寸猶勝於河干之揚不閱其質而求多于
華天下豈少榮華之言哉昔者杜子苦陰無名逾壯
而北海太守稱之及其晚錢劉大厔才子燁然高唱

中朝而流客老死不得並馳爭一日之聲李供奉大言亦然要以大雅不吝知音不絕鄭子固已一世甘瞑不驚名能無旦暮哉

古論自叙

讀古論十七篇往丙戌廬居讀禮暇讀史而據所一
察論著之也先是二歲以舒令奉陳太孺人之官其
明年以喪歸家司訓公在官尚無恙日夜勉以順變
而厲以當世之用曰學古入官鏡得失之林所以參
比而經世用也小子可不務乎大孝顯親因是小祥

後奉教發二十一家史而稍稍論其世考其得失叅
議其中著為篇大權練要期以一當畢究其用奉訕
無罪亡何而大人病棄官歸脩藥焦然再月而又不
起逝矣傷哉自是斷手湮沒六年每攬流涕如慕我
罷習焉故草散遺几櫝間逸其四篇所存厘若干云
今令陽信傍郡北海門生王家植間時過請業及之
是時處海二年予已病矣檢示相對而戲噓乃據床
嘆曰天乎傷哉小子何罪夫至使斬焉剡然孤子墮
教不成志以負吾公乎而今一旦尤至羸瘠亡效哉

長春故吳中補布儒也父母身奉腹禦窮食貧育之
天損之曰既閔斯何百報矣讀書式教三十年而試
一官曾五斗歲月不逡巡而何譚顯孝乎生故有氣
狂豪少季書案前動閱古人撫當世忿恚不自忍謂
義所在引頭奮臂赴之耳揣摩論成敗志固薄文辭
異以效節報

主上也矣泣苦土五六年首垂白耗確心以守一今
簿書今西征東討

天子念外人之非身不得陪末議叅戎行振多墨之

恥則孤憤無用為虛 國恩負親志矣又奈何海荒
溽鹵霧露之中腴腫痼而神明銷死之不圖而言他
乎已矣復何為士不敢論德始事親終事君際時揚
權立功名當途冠帶之倫所務也著書不得志其下
耳予長負吾公哉天乎已矣復何言是日也王子方
飲於官舍榻下為予罷酒明日復入視疾再拜請而
刻之曰微其文我以表先生之志在斯先生自愛起
樹業弘忠孝壯尚可圖也寧韞蓄積幼志長卧忘吾
君哉予校涕拊膺揚目力而謝因感王子之義因次

為序

奉送四川按察使張洞齋先生座師候調還
序

昔者周之盛時賢人服職王大夫奔走四方不皇居
息榮其勞而詩歌之曰四牡騤騤周道倭遲至其後
也官行雜進仕者樂退而詩詠里居曰十畝之間樂
者間閒騤騤進有文也間閒善息也君子當世孰不
欲盡節靡盬媚於上表功名而使束其行能甘寔場
間保晏晏之歡賢者於是覘世焉抑其樂飢畀嫗可

以起頑標於俗天下有寵危人禍而哲不與焉故曰
間嘉之又幸之矣故當不知進謂之愚當不知退謂
之迷豈其必怙貴死權沈瞑而不反乎三君八俊諸
名士自負中德囂囂志蕩一世之波而倏然觸當世
之不容猶其道之外也易曰知微知彰知柔知剛介
于石不終曰夫子今見天下之時乎天地不交官府
異體當路爭柄與主橫權大莽敢於逢指利口勇於
求勝留中俞多傳奉曰增猜妬刻深傾軋咲巧
主上不能定相君不敢言正類漸空陰瞠曰結黨禍

立至小者武安魏其之釁大者陳竇牛李之毒咄嗟
須臾倪已見矣小人得位自為也君子為人也自為
呂鉅而侈為人執掌而憂侈辱生憂伐生是以決絕
適卧之徒矜曳尾而笑之曰貴不如賤富不如貧故
巢父唾糞高之勤務光垢門尹之勛彼其盛際猶然
而况其履霜安知夫據尊者之不至悔其不反乎安
知夫失者之不為得乎先生可以樂道思勿諼矣飽
食可代肉緩步可代車詩書可娛弦歌可寫臞臃社
里牛酒可樂歲安坐高卧閉羅門啟竹徑謝公

交際罷俗償禁世論自以偷生習道課子抱孫當此
之曰太古之熙熙神仙之道遙亡或過也安問世哉
食人之食者與其憂乘人之車者與其危將使餽糒
同塵縵心鬪捷媚於俗而營於窟以是盜人爵而盱
衡羞於菑疇之車賢者必弗能為將使守道堅節猶
焉澆一世而自為正悟

主率俗效功名於官下不賢者必弗能容也今公孤
以下官莫崇于太宰權莫重于吏部政莫大于進退
人才四五季間去如託宿留不行志先生又何能必

善世而信其道而何恠於讒退退自適而離網顧不
至樂與往者十季御史三役省方勞苦資深不得內
遷獨行之無侶而宦術難工是時先生已見其微矣
何必今日哉春黉百昌華者為榮秋氣摯物歸命為
實天之運也道之自然也先生玄攬達化故善自寬
國是俄定泰征其吉黃髮之詢佇可在望優游樂生
以俟再駕咄咄空書牢愁祿祿之徒事之寧間間者
所為哉先生歸矣弟子南首而望清源知菟園在焉
占於時憤於俗要於進退人皆慰先生弟子獨廢先

生姑天遊須焉出處俟其時應之矣謹序為文稽首
進送之以當搔杖之侍

茅薦卿楚遊詩序

楚自古多遷人賦客焉楚地澶衍廣饒多大川其俗
好詞巧說湘郢之間文采流風漸人士至其地往往
儻佃山川攬南紀江介騷然輒不已於懷故其結勝
遺靈風韻千季未斬要以遷置放逐尤多去國憂生
弔古悲牢不平之感焉茅子故以侍御史謫令丹江
竟襄鄧之間居歲半召為郎沿洞庭以歸於是

楚游之詩太史公曰詩三百篇大抵賢聖發憤之所
為作也此人皆意有所鬱結不得通其道今夫茅子
吾里奕奕賢公子而倣儻經濟之才士也自少好高
節恥與純絳伍務抑其貴介而恂默為儒風已仕為
令章丘約法簡獄而樂與其民煦煦調劑經筦省縮
及於鹽米而戶留竒六季而民沐其澤如數世始
呂為御史未持斧按一部而謫去夫以茅子生長富
貴世家驕釋江南靡滛之俗初試蠟邑拮据甘辛苦
與百姓興便利義不涅於其土予後令齊而聞見之

勞能可謂著矣自以里多豪貸責田宅黠奴橫行家
既富資不復問息業生產杜門謝事省游交造請壹
意以謹約下繩其宗黨僮僕而上曲調於宮度之間
其賢風為諸豪公子倡首被於他其憤懣奮然欲赴
當世之急而弘畧報

主立功名素多忼慨也而當事不察俛以世貴故裁
之豈不冤哉茲所謂發憤之作虞卿非窮愁安著書
自見乎雖然余嘗讀離騷懷沙鵬賦等篇悲其忠過
一棄於主而懟怨菀結不自容至不欲生何其隘哉

抑亡其計不長寡於恩愔然不能須臾勿顧後矣義士猶薄之乃茅子何其遠也非不睠顧抽思感於世而中持愴夷攬變於去來損益而冲然要於道不欲以御史故貴教陵人而以謫寢其官謹身循民如故摠誦憂旱詩殷念比於暴身咏懷諸篇爽然懸解矣安見有問天吊鬼謫然之悲乎所謂怨而不怒遠而俞恭吾於此觀其品焉茅子起進用當事寔樹可在古賢豪間其志有卓然遠攬標義概於天下非獨欲文辭稱也而辭顧益進去巧薄榮華比於雅離世溺

音而希於古要其才有軼俗似其為人夫亦楚之江山遺風輒被人而助發其靈哉昔詩初振於何李尋壞於五子今世變為六朝六朝非其正也而吳興獨能為唐允升之冲真伯念之風華晉郊之婉縟允兆之澹清鬱然並起而僕以氣調微長參差數子之間今伯念喪而茅子起古者望正始近者望開元蒼然體質具矣又其季孝若弱冠美言翩翩文俠公子逼人

人也詩其有興乎茅子方

請休沐侍鹿門先生老未起天下事未關懷哉無所

試閒居絕俗無事伏其雄才益汎濫於古人著作當
益深進而立功退而立言同在不朽之次也茅子勉
我詩其有興乎孔子曰何莫學夫詩邇之事父遠之
事君茅子深於此道也行一物而三善皆得忠孝文
章何不美焉

贈廣德州太守段公徽之異政序

嘗讀漢循吏傳所載皆多郡太守事而宣帝每歎曰
與吾共此者其良二千石乎當是時太守職方嬪政
令主斷殺如古諸侯而無方伯三監矯其權見善輒

取便宜惠澤朝課而夕暨於竟縣令長奉教承辦耳
故吏治于漢為盛後世莫及焉上故能假之非獨奉
職善也 國家分天下十三部設二司轄諸郡郡轄
州縣而 南北兩都稱大府如漢三輔馮翊扶風領
於

天子尚書為直隸往往富劇大州亦如之廣德其一
也故州太守寬尊齊於二千石而太守治亦往往多
良州地古故鄣之南界不山谷少田桑無賈市其民
勤山采給薪粟之饒無文巧鷗游而愿畜畏於官稀

凍餒之夫亦無豪俠之家故其治易行拊循被之恩
常倍於他賢者喜自見焉然而驚武烈深忠雖不獨
者每每亦狎其地驚然陵轢刀俎無所憚橫行流毒
不少也故兩漢四百年賢太守功名著於傳莖莖數
人乃以予所聞段公治政其事蓋在桐鄉潁川之間
可紀焉吳興與鄞接風聲相望吾友李生熙載又數
數過予游道其太守行事甚詳也曰歲癸巳旱稼稿
太守初到官而徒跣禱於郊三日大雨苗起州荒五
歲矣州穀少民間無窮輓載艱每荒輒死亡太守來

而三有年流冗四集勸民積居京困相望於野桀黠
民好訟繩引亡辜一辭連逮數十家太守嚴其主對
立囚獄格以案不情又能鉤鑣得人於不意而猾賊
吏不敢為非反為用常偵事於百里外如見有以教
人誣人者陽繫而陰使詞澤其真質之伏地請辜一
州驚為神焉削木隸書期日以呼告者人輒隨隸至
不費一錢輸賦量年上下寬為期灑其數而次徵之
先富人以及於下戶征吏不走於鄉而賦報常首傍
郡百姓忘輸內行謹而仁愛邑憐貧人歲時設餘錢

散穀收養薦瘼孤寡下于刑囚明察善計旁午立辦
事無所不理而持寬靜不喜小苛息其民常曰吾治
多古風事簡官不患無才患獨有才擾耳謹身率先
欲與民相休稱治平何取赫赫哉性都雅好談文辭
延禮士視如子弟以其俗少文不甚利制科益注意
訪勸之月校藝難經往來拔異等表寵以風士奮蒸
蒸祈嚮焉以故太守治兩歲餘瑞應屢見異鵲巢於
門樓火夜焚署楹熾數丈不焦若有撲者而城南龍
眼清龍眼者龍池也池二在州之南山當其郡所衝

左右夾如眼其水常黃每所至太守賢水輒一清自
宋范文正公始焉越三百年

明正德間有姜公

今上時有吳公同春而今有公公與吳先後俱汝南
人尤異焉鎮吳中丞與直指使者察公治能交章

疏其賢其學博士沈儀范邢蘊蕭韶三先生領諸生
鄭勲董用賓葛鍵等因李生而請言於余為頌之予
曰異哉段太守之政漸於士民格於天聞於朝雖
然鎮臣按臣歲奏良吏數十人亡問不當即賢者

多敏給佻達率其才獵聲或便巧善傳伺逢拍滑稽
無不得耳假有智慧飾其姦肆於士夫乃虎而翼乎
所由與段太守約躬廩廩結於民遠矣民可刳天難
欺必如稱太守三異難焉龍池數百十年一清應其
人不爽此實有天道豈為矯誣文飾乎異哉予感其
事為述序之令傳於世與古馴雉渡虎當更過焉

朱太復文集卷之二十六

五湖朱長春太復著

記

天遊園記

山居之民好陵而靜澤居之民好游而蕩平生之民
好奔走而嗜利益其地勢哉燕趙之間古稱文天遊
歌慷慨今於國家為三輔地習游學滑勢利天下
冠蓋商賈轉轂交易百物之輳其民益踴矜仰機爭
權無勢之侯徑竇緣附交通有勢富者設射為氣招

蠶黃者陵僞侵蝕橫于里相與高門大戶相聚戲遊
鬪衣馬從娼優子弟挾美女靚妝抱瑟而彈歌奉危
佐樂飲嗚嗚為歡以此傾一市曰得意遊為常稍稍
有孤下之士疾而矯之立苦行已甚不堪而不情詭
節者抑往往貌聲而陰賈其欲人情馳驚有由來矣
朱子曰此非天哉耳目恬熟常人不恠賢者獨行何
俗不統焉靈壽有馬封公獨以儻雅寬緩著好靜而
意在山林之間嘗為諸生高等二十餘年不仕仕其
成進士輒喟然曰吾無償俗矣營南城園老焉環

籬塞徑日日自經理園事市之豪長者從高車大馬
日候起居不見則相與數故事為咤者此地希名山
水豪貴人眩其土遊為驕奢而不以林池為樂如公
蓋得其天性安在俗必靡人非賢者達觀烏與於此
乎園背城面嵩陽河河惡池之支也其南有山園可
十畝而廣中樓霞樓前曰悠然亭雜花竹周之又前
小亭四豁池環水帶有魚中生蓮華前後浮梁南累
石山山立如案石山外土山遙俯之若抱云松木百
餘株在土山上有巢松亭他為禪閣琴堂奕石酒牀

在松竹間往往星錯周無垣列柏為柵四隅皆隙為圃圃種藥里之故游素心隱者時時間設具飲其中酒酣輒調琴歌考槃顧父老和之喜曰吾等相對皆老矣世事付之兒輩人生遊於天地為樂耳更逐逐較計何為吾保此以畢吾世也夫園自洛陽始盛王侯戚里娛間之家競飾亭館山池遠集珍草瑤樹靈禽恠物名倡充其中角勝為豪其遺風今在江南延州姑蘇間氣侈王氏弇州著名于天下又自為記以誇于世一園可當一大縣賦四方好事文繡子弟萬

里累糧而訪遊如昆侖瑤圃希得見此則名園之遊
極盛者天下無儷焉客有舉以難公公曰不然吾遊
殆將勝客大咲去物至尤者生惡多聚者易毀自石
衛尉李衛公敗後天下至今齒牙一丘一壑適娛吾
意此已多矣窮奇造巧極觀富貴豪舉之事也傾家
餒一生於園物寧有概乎雖甲今未必勝古此又以
園為累者也大林丘山之善於人而神者不勝是皆
以物遊何必金樓之顛而後為居乎進士公今為青
州司理行部至厭次為長春道其事長春曰此所謂

天遊天勝人即令公生江南當匿名山中何至如夥
沈沈者百牢濃鮮飽不如飯此言可以喻道因遙命
曰天遊園為之記

雨華庵重脩記

雨華庵在湖州郡城西南偏湖中窳浮圖之小小者
庵窳舊莫考其初時傳聞起自齊梁間是時西教始
盛琳宮金刹往往侈於天子居而自都會外遠郡荒
落或未能修效如制以故卑湫狼籍自昔以來然郡
寺劫興廢迭不一此庵獨存豈亦其辟隘不為有勢

家所慕耶庵負市面郭郭前有閒田故為宋賈狀元
秀野莊至今往往忘鄉先生別業隣築焉地氣幽浮
圖氣靜又傳自宋臨川王安石蓋常讀書於中云至
今三百季郡中博士弟子歲群數十人集其中游學
稍稍時隱者亦偕止也道經窮巷殿宇不敞無佳觀
故無娛閒富貴遊遨公子往來然而城市惡少年亡
賴游手作姦不軌之民更時時羣會博戲酒食喧譟
作踐毀壞不禁自勝國至元重脩今遂垂廢矣望其
山門若闐闐之家殿堂半歌佛像披披在風雨之交

往歲乙亥予始來讀書寺東廊禮足而凄然時厯兩
傍僧房頗完好有更築精舍益宮飾垣不已寺僧二
十餘人半貧碌碌稍富則攘攘日夜謀竒羨息貲為
家人業予欲問以庵事不得其東北隅一老僧六十
矣獨嘗兀坐微誦數曰心異之微問曰老僧汝曾見
學宮五十率不葺而居士乎老僧頰頰頭搖手頽獨不
應也已而予去以丙子計偕上不第還更二年戊寅
復來則庭有積木堂廊堆鋋瓦土石具且興工焉明
季殿架成予又北上又外游學二年壬午又來聚徒

講禮於中則殿重疊如新矣門廡完階除甃又去應
祭未太常第其秋授舒令還吳過問僧蓋神像儼然
塗黃金堂周施漆丹遂如故貌成焉老僧前合掌謂
予曰惟予大夫之言今克有成予蓋十年瘠口脰足
募財經植乃得報大夫遲矣雖然此庵難成易圯有
四故構簡卑不便緣飾游客希通施錢絕少頭陀弟
子各志莫任而市中嬉駿子弟及甫落連袂成羣譁
萃於中僧家不敢問老僧故慮其率矣願借大夫言
標之以誡後予因執其手感而嘆曰苦行哉老僧吾

向識子於元坐頃矣夫築宮建塔鑄像施經雖于而
宗為外其于扶教一也謾念興教之力堅依累十數
季不生退悔以底成事此其心何異十地之業乎即
外果知內果吾于老僧觀脩焉雖然士立業何不然
今天下攘攘居平指天畫地負豪敢任豈少哉率當
艱勢立義違衆孤植不勝譸張首鼠安有十季能持
苦者意向者矜節客氣非老僧坐心哉事故不成於
喜任而成於堅靜予因借老僧標士行焉遂為記
事僧曰德鏡人號無塵上人云

舒城縣重脩學宮記

三代以下興學自文翁始自漢武廣焉予蓋讀史知
翁舒人也自秦焚書漢興六七十季洙泗青兗間仕
者不聞勸學之令獨翁黉業於自古西南蠶叢崎嶇
僻陋絕學之鄉一朝化推魯而彬彬嗣遂有相如君
平王褒子雲之徒踵突超矣以其閎攬博雅風騷
為漢詞人冠皆推本文太守學官所漸焉予嘗想太
守生不在齊魯又會禁學後偽道寡絕無疇官抱經
世守史亦不見詳其負笈重趼執業遊學之地淵源

莫考其自意其鄉或偏有先君子孤傳耶且大守治
既已用夏變夷豈以父母桑梓謁跡之地并閤耳目
薰習獨無斷斷揖讓之從文物悉盛如關里奈何史
無一傳也癸未歲余受除令舒至則首按其地里乘
舊文蓋亦自太守以上關焉其後越二百季始有周
榮起漢章時無當相如輩公瑾則少文矣以至今三
千季絕無聞人之尤明日訪其里縉紳為鄉先生者
厘二人以前二十五季舉於鄉今絕曠無繼矣因閱
諸生藉在學官一縣而百五十人不足又明日謁孔

子廟至則櫺門戟門壞道塞不除廡不隱牙廟不蔽
兩階不拾武羣哲之主坐於風露已集生徒升明倫
堂顧瞻門垣有頽兩齋湫迤自博士官舍既已弛狼
藉而弟子負號舍不備諸生待事者累累立日中草
間歲月師友譚經樂羣無所則門士分散寢情寡集
會學如空矣於是愀然禮博士先生諸弟子進而曰
嗟乎舒陋至此哉文太守豈異人乎太守既已出化
蜀今使太守生見其鄉太守能無痛乎歲時恐太守
不食此土矣夫太守居舒不能使舒化及操郡符之

柄握誘進之權然後脩學獎士而夷風草也此豈非
躬率以身風行在位哉則舒大夫之責矣夫教為治
首士為民首文塞不華地之恥也教湮不舉官之恥
也舉而不習士始恥之矣以蜀之夷也辟遠一朝榮
太守之學官出錢求員以化如枹鼓安以吏取期簿
書卒歲坐學廢敗至此可謂地無人乎方今文學號
大江南吳越為盛齊魯遜焉而舒叢叢倚江介山隅
不接海內都會遊客往來稀迹鄉宿老流傳既少而
人重土絕境外大士之交即開美才人無觀而起者

氣蕭矣長此安窮予不敢望文太守吳人也習於長老疇業意興學在斯乎小吏何敢讓焉乃與諸生期約月再會別署諸生大昕集待堂下博士先生臯坐堂上而譚經諸生次進難予久其中為博士辯往來決其疑已諸生就坐請業為文予為陳其說諸生搃筆而演焉既成羣立與博士揚榷品之獎異等以風而隨遣吏鳩工脩治學官宮堂闢其門夷其道築其階則士趨雍容伐買西山林為殿梁補椽板添橡楣飾位座則神棲妥焉堦土鑿石上蓋重瓦下鋪平砌

傍周垣而封之施采堊於柱枋門闌壁牖之間則烜
然弘望矣堂後飾治尊經閣板梯戶牕蔽風可居先
使諸弟子頤學者息焉役起甲申七月農間至十月
工已告竣又方聚材息貲將辟二齋下墀東西築生
徒舍二十間令得羣處習焉成乃欲遷會署於此於
是舒士中庸以上人人爭湔袂應令奮臂而起矣闕
闕村落成人小子咕嚕之聲晝夜達戶如江南焉十
一月朔旦二博士楊憲朱邦喜領諸生潘懋南等百
三十人集明倫堂頓首謝曰良哉幸甚不作不行不

振不興不繼而不成舒千載一時哉願令公無忘文
太守之終教願諸弟子無忘相如之突起自今相與
有成在此宮矣因要余記而刻之門曰吏士交勸焉
陽信縣重建講堂記

縣古在燕齊之間今國家并屬山東合於魯故燕
齊號稱多游譚奇士文辭監焉先王之風在魯聖人
洙泗之間想斷斷也至今六藝流天下豈其比壤也
而何寥落耶予車至而愾之其地無千年之跡而無
三百季之家傳自

文皇帝定都北平稍稍遷徙民實居其中昔在永嘉
之間祭器南奔中原文獻蕭然況埽入江左矣唐百
率餘而棄河朔於中為戍鄣牧區沉淪至明而始
開土之人目不見衣冠禮樂千有餘歲安在其遺化
耶蓋亦天道之移地氣有厄矣漢時齊魯儒生學者
棄家裹糧負笈不謝千里以從師若游太學動四三
率或十率學成高足乃歸其貧者或至為人都養不
勞恥古學士如此其勤苦今縣亘北海沙中一區陡
絕中原搢紳冠蓋四方賢長者希不通地窪水下濁

民生其間自為耆宿社祝計青紫耳安得踴躍文墨
之上譚先民之業乎夫無文王猶興豪傑之士也地
固不常有官者故四方之良也語曰鳥視而孚蟲視
而似人穀而善昔蜀金牛之前萬八千歲不通中國
建武之後司馬嚴揚文學撫節甲天下蓋相如實與
講堂同時後世郡縣庶學取於此噫文學之化何速
耶翦草復土三歲而畬平畦燒薙半歲而稼此言新
故之田農有難易也縣即久淪何至加於絕機叢莽
起遺風而潤色之譬如浣人去其垢耳俗簡意淳古

扶以至道不難下之咎不和上之咎不倡二百餘率
矣豈無文翁其人至耶天下學皆有尊經閣縣獨廢
且百率易為會講堂又二十餘率廢址狼藉一架存
其事可觀焉予攬初至時文學弟子訢訢誦說虛聲
為叙海邦絕學屬千百率興起相託輒撫焉注心此
其人志氣何遽不如古哉願謝不幾道其好士喜文
章講譚詩書亦有天性業既時時以吏簿暇集諸生
執經會難月二大期考比而進差之邑之俊少年有
氣無不在鄰郡縣亦時至者斌斌祈嚮往矣其明率

謀建閣會時詆重役乃構故堂稍廣而飾之命曰講
堂循本也當是時集士轉盛陽信之名聞於東方傾
動數百里其秋舉造士三人隣弟子又一人其俗以
為文振喜予曰不然予所望若古之雋寧陽陽累累
取富貴多耶桓五更之諄力達雋醜之介者介邑故
不乏矣道盡於六經雋者由此為通畔此為詭出以
之善世居以之表後

皇帝立尊經閣非以藏書使人明之天下雋生都誦
經自為制舉課義之業而經晦昔者漢雋治一藝白

首生平廣習博比揔其會於經師友問難百辯不已
取以翼道而經世用守閭戶傳堅白不變後即詔其
支耕鑿於道然數君子出為公卿引經傳政有卓介
可觀或退所著述炳炳不同道而有致諸緯至為吊
詭矣亦倬絕傳焉方今號道出於一天下無私學然
而家授戶解不離耳目膚毛卮言濫耳及其成就於
古人可較也或者溺不講之過哉竊見世公卿大夫
方釋褐輒棄去筆札書牘師刀筆吏為習事逢迎固
謂汲汲為有容事至隨其聰明為能辯見有古學

罵曰此讀書腐儒安知吏夫仕學參也平居既勤龍
曉曉一朝塗車棄之安在經術經世乎夫學之不講
聖人有憂多識前言往行所以畜德在古聖賢無比
肩動越五六百歲而望起其間寧有師友授習今人
與居古人與稽所由求焉天地之運盛則衰衰則開
極則反北方之學千歲或興在茲乎豪傑之士決起
自拔依於古人宣明道真為代儒模出而振世扶先
王之功慶則述藝以待來者蓋齊魯之遺尚於勉矣
無負此堂予不能為役

陽信縣義田碑記

濟南府武定州陽信縣為廣義田永存恤事照得令
曰民牧牧之事取蓄蓄息有贏者別牢而飼之無使
殘故一馬倒橈國人之過一夫道殣有司之責天生
齊民衣食其力怙其父母倚其妻子以是致為常不
得其常者蓋添氣所結天地之仁有缺不賅付之君
君有限不賅而分之有司故將以廣而助之非拘以
守文具也三代窮民廢人廩於官縣數無額後代病
坊止於京師國家徧郡縣設院養濟法古示仁無

窮也而當事慮其濫沒於是為口限式式賦以散餼
賦不足雖累累委於桑間野外目憐而不得收間有
收者其仁無倚以相永終其官耳此非以廣主惠濟
不賅而盡蓄牧之道也抑土有沃瘠地有衢僻沃者
衢者即不食於官生之塗猶衆民瞻而不重施今縣
海曲一九耳禹貢以為廣斥也潟鹵所浸濤颶所淫
十分而二不毛稼者其穫甚餘而河枯多旱三歲間
一荒不在止瀛舟車輓運貿遷之賈不通民除本業
傭保一錢無所爭覓而顧以民濟急公賦浸加甲于

郡以故蕭然生盡幸善避徭起賤流活四外不少荒
則塞屋檐旣衣被絡兒女罄家空村而走此其少壯
有屬者已如是苦將令焚獨無告坐死之人何望乎
又海縣下濕厲風其民癰厲瘡盲殘枝體偏死薦廢
者多人多棄養濟一院六十名口然往往滿額則待
者無所望斗水活須臾而聽補先已為溝中實矣先
是前任傅知縣首議穀不給收養少設處易匱法難
永利請倣古義田指設金錢買民間不易良田千畝
召佃息租歲穀三百石收食院外貧民月膳三斗可

使邑無向隅官有經制兩利於今益廣方來申軍門
李詳可事卷在十七季尋買有地五頃一十五畝八
分租一百五十四石七斗四升存養殘老無告男嫠
四十二名口明季傳知縣遷去因將見田冊報刻石
而千畝未足遺口尚多又邑諸生故多貧無業時時
貸告縣官粟粟稍分不繼而城市窶戶子弟又往往
緣無衣食不得入塾師習學輒廢窳無賴學以不振
因為調停分其見穀簿贍貧生若干如其民城設二
社學以貧有行弟子為師月館於官穀一石收教城

之童子家無力者萃數十人於中夫士自古多貧矣
士誦法先王理不得為生業貿衣食而謀不起家則
闔門束腹執經對家人而餓病稿殍亡何縣齎故夥
貧民士安得無其具手足不能食力又等於廢者法
無可收民而棄其傷非以優俊而興作人其懷幼造
小子廣學亦與養老哀獨意齊其尤為牧人首政不
可已則田穀既未廣而又三分不瞻也於是士民見
在者缺膳呿憂半年矣嗣其後而無濟法窮是無晝
也半年之間必致流離餓死相籍坐而視斃無仁也

上有令甲茂不循守無職也前有善未克終而後不
為廣成無賢賢也惟皆職之責矣隨於是年初到官
由設補半年之給已明率損官錢買良田王秩等凡
六頃三十九畝九分又核故隱沒田秘應川等一頃
二十畝三分共七頃六十四畝二分歲得穀二百二
十九石二斗六升通前知縣買計摠得一千二百八
十畝田歲三百八十四石穀於是添立城社二村鎮
社四選師王國珎等董之益收貧生賈成山等五名
民李廷芳等三十二名口通故所主收凡社學七蒙

師七名貧生二十名貧民七十四名俱勾支一季養
院缺取之收養收養缺別聽告補死者官別給棺埋
之行幾三季未敢謂野無行自而見飽粟之口且延
旦夕文學即未盛起而巷無金石之聲里有絃歌之
頌庶幾養而穀之無負任職永廬前規後人繩繩不
已則一縣無飢萬世之利也二十季坐多病卧再拓
未皇今已遷則已事當垂久額將來不至湮越法應
具申其步口段落賣主佃戶俱造冊立案印帖給照
并前傳知縣建置通刻一石立縣儀門外是亦廩上

德而建民利或有賴矣二十一年二月申軍門孫某
曰如議令長春因次辭上石背列區尺主名先後二
籍具在為示明白永久矣

遊峴山記

湖州諸山三面迤委赴城其城南半里則峴山舊顯
山也獨近諸山屏障曾峨峴山數百武厯其褭形如
丸又獨小下枕碧浪湖則餘不前溪二水西南來數
百里合流當山而渟一區清若鑑焉云峴山溪溪
中有石如洲如眠牛四周水環畧亭四時水漲落長

浮浮然云浮玉山其上新有塔有亭殷峴之南當寺
門升峴則吳興之勝畧盡南列道場北盤弁蒼東北
俯郡城萬家之烟故吳西一名地也嘗郡縣大夫與
鄉先生郊集為遊所而四方過賓往往停舟試寓目
云蓋自左相鑿空石尊而三刺史而近逸老諸公里
傳記翩翩此山風流之美矣萬曆十五年丁亥十月
會稽理刑使君楚陳立父行吳以同歲舊枉問予吳
人士與山川之勝予因奉使君為峴山遊請鄭允升
孝廉不焉予家貧無牛羊水陸擊鮮財二豎提一斗

酒雙柑盛鮭蔬陳于山首竹亭候使君使君為教縣
具樓船黃頭櫂卽十人省騎吏自城門登船邇流來
艤於山寺之門將自峴畢眺乃移酒放舟遵湖容與
而南涉浮玉陵前溪直抵南山之淑上道場極顛而
攬望五湖焉會少選天大風南來湖生波擊岬漂舟
不得渡則相與除草張席野坐峴之亭帷帳不施伎
樂不御脩然寒蟻高木之下倚酒雅譚山僧從吏忘
使君之隆此為賞也酒三行使君起曰美哉山澹水
長此吳西之秀乎夫地以人相重人以文相重兩君

序峴名遊數百季著吳然吾於楚未有聞雖於天下
不如襄重也此寧獨羊公一碑謝哉或亦文采闕焉
今西君倏然惠招不佞為此山辱千載良集四方同
聲在此席也西君為一言志游曰不佞附以從允升
曰佳哉夫蘭亭滕王以後未見有能言者也豈遊賞
聲詩頓絕將夫不朽者非乎山川相助以醜非相助
美者也大雅廢久今之謫謫高墜衆甚後或以為陳
夢矣必成方合雅而後傳則且掩顏太守登山聯吼
故名我不能是在使君子曰不然登高作賦自古代

起然矣必宋大夫之後無言哉亦各撰勝述情隨才
自暢王會稽曰後之視今猶今之視昔也且士業已
習彫蟲繡虎揖讓千古之傑何渠不遠駕自壯徐康
靡靡後杜陵生去二百季彼非丈夫哉安所知山川
昧運不畱待人夫詩言乎志文生乎情苟其神理寄
以長存則一工伎器無不壽不壽者神衰而色偽也
山之蒼蒼水之汪汪此非天地之神乎哉自古固存
文若是矣振雅業之墜續襍事之高弘此山之名可
不務乎斯文不絕吾輩誰不當任顏相與定盟復古

自此山會始於是陳使君引醴酬地曰壯哉士如此
乎百世後誰知吾等譚文慷慨於此是當寄之於是
使君鼓掌引聲為唐體七言一章鄭與予倚而和之
予又踴地迂聲為長歌一行使君與鄭亦倚而和之
既闕乃顧予記而書之曰亦此山風流之助哉蓋遂
以至暮乘風歌唱而還